

戒菴老人漫筆

戒菴老人漫筆卷之八

江陰李詡

凡荒歲民艱莫不以賑濟遏糴為急務不知此事非賢父母實心舉行量時度勢將有不足以活民而反有速民之斃者余觀楓山章公論賑濟遏糴二書深有補於咨諏者之聽也錄之與許知縣完書昨承來教詢及賑濟事宜此君子學道愛人之要務也但昔人謂救荒無善政雖以朱子大賢浙東荒政其功德

及民甚大然猶自謂不過討得幾本青綾冊  
予不能盡如其意則其他可知矣况區區淺  
見薄識豈足以仰承下問之勤然盛意不可  
以虛辱也姑就来教所及并區區舊日所親  
歷者畧陳一二以備高明之采擇焉一来教  
謂每圖貧戶擇其尤者四十戶報之此意亦  
可但不知令何人開報若付之糧里適以為  
其取錢作弊之資而貧無錢者不得報矣愚  
意只取黃冊圖眼將該圖里老親自審問假

其家戶人口若干田糧若干以何事為業其  
有田產而富實者不必言矣或無田產而為  
商賈工匠僧道鑿卜諸伎藝之業者皆可自  
給惟無田產無職業及老幼殘疾者乃為真  
貧所宜賑濟其或戶有田糧而為他人所詭  
寄或同戶各房有田糧而本身無有又無伎  
藝營生者亦為貧民亦宜賑濟此等事若非  
為政者先之勞之而付之手下之人則有無  
端賣弄作弊不惟無益而反有害矣一求教

謂書記號簿填寫小帖甚善甚善但付之里長分散則其或散或不散亦不能無弊不若令里長叫來驗其人物飢瘦衣服藍縷者親自給散為無弊也一來教欲令里長排定資次責其彼此相識以防詐冒不若就依圖眼資次面審令其彼此相識又欲以一縣分作五日亦恐難以定限若事務忙冗再加數日亦不妨但恐厭其煩勞而付之于人則未免如昨書所言前官之弊矣一區區昔年在福

逮分巡至浦城適遇賑濟人紛紛來告不公及親到倉中看視見其手冊開報之人俱無籍貫詢問其實則皆坊長大戶招集四方無賴之徒來彼間治鐵冶每一爐多至五七百人關支倉穀而去近倉居民不得關支忿其不平爭告前來區區謂彼既不曾附籍在本縣當差如何該支賑濟即將各坊長問罪追還冒支倉穀人心始帖然而服及審所告之人雖係近倉之民然皆衣服整齊面帶酒容

亦不類乎飢民不該賑濟退此二種之人次日方有十分飢窮之人來告却與賑濟其數亦不甚多其知縣亦是通士方自愧其所為之未善也以此觀之則今日之事不可不親自審察矣一區區昔年分巡至邵武正值飢荒米價極貴本府倉糧不能完納小民紛然告求賑濟而倉無顆粒之粟軍士群然告缺月糧而查軍倉之儲僅可支兩月時將五月青黃不接分守裴叅議無可處置避而去之

區區謂其軍士曰今倉中無糧與民之飢荒  
難以追米皆汝所知也吾欲每月給米五斗  
支銀三錢與汝則可迺至八月八月以後則  
各處有米糶與銀六錢任汝轉易軍皆樂從  
乃謂其民曰汝欲賑濟而無粟可糞別無可  
為汝今徵糧上官每米一石該銀一兩二錢  
於法不該有免我與汝減價止納六錢上官  
其餘六錢就與作賑濟民皆懽然曰得如此  
過于賑濟矣其有田無田糧而貧困者乃借



支布政司銀所以賑之上下皆安不然幾於  
激變矣今本縣科派煩重又有散鈔散鹽等  
項無藝之征若會計各圖飢民該用賑濟稻  
穀若干就令該圖里長領去糶賣以代貧民  
辦納料銀若干使民皆受其惠則官欠易完  
而免於豪猾冒支官穀之患雖不賑濟猶賑  
濟矣此乃權宜之法不知如何又書云今年  
荒旱積年所無甚為可憂周官十二荒政所  
當講求先輩有救荒活民之書亦宜時常檢

看早為處置以防後患近聞官府榜示不許  
外郡來此販糴此乃世俗私小之見非公平  
正大之道既犯五伯之禁亦非朝廷之法  
一言之失弊端隨起小民因此但見有穀船  
米船來往者盡行搶奪搶奪不已將成大盜  
先年曾有明鑒矣不可不謹其始小民訛言  
皆謂官府許其搶奪此聲傳揚恐非美事必  
有受其咎者客商被奪必不甘休若往上司  
訴理來此追捕縣中將被其擾易所謂行人

得牛邑人災者亦所不免。又況今官府催併物料皆要銀兩。設不糶糶銀兩何從而出。此皆理勢之必然。不可止遏者也。乞早除遏糶之命。及嚴行搶奪之禁。以免數者之患。乃今日為政之急務也。某居林下。本不敢干預官府之政。但以執事相愛之厚。偶有所聞。深懷隱憂。不敢不以直告。惟執事察焉。

江陰侯孫名鐵舍者。腹大善啖。平生未嘗自見其足。永樂間至京乞恩。

太宗命光祿寺茶飯計食六十斤謝恩拜不能起命兩衛士挾之因不得襲蔭後家不給食饅頭又食炆菹俱成籬以充飢

此等入直如大豕耳

劉應幾古今詩統記宋進士張居中題李林甫詩曰當時淫侈信奸回誰料韓休荐相材偃月堂中猖鬼散水晶屏上美人來其下注云初韓休荐林甫有相材林甫當國凡除拜必用猖鬼敗亡日欲其不終吉國忠作相在家有水晶屏上美人影敗之日美人不來按屏

上美人影本非吉祥一書記屏上美人見而  
國忠敗與此不同

絲竹筦絃右軍承襲漢張禹傳中語禹傳曰禹  
性習知音聲內奢淫身居大第後堂理絲竹  
筦絃四字實二物東都賦亦有絲竹筦絃字  
賦曰陳金石布絲竹鐘鼓鏗鎗管絃燁煜抗  
五聲極六律天朗氣清人多指此句非春景  
不知潘安仁閒居賦中有熙春寒往微雨新  
晴六合晴朗語張平子歸田賦中有仲春令

月時和氣清語滕王閣序落霞二句子安  
襲庾信馬射賦落花與芝蓋齊飛楊柳共青  
旗一色陳子昂有殘霞將落日交暉遠樹與  
孤烟共色新交與舊識俱懽林壑共烟霞對  
賞同時駱賓王亦有斷雲將野鶴俱飛竹響  
共雨聲相亂子安自為山亭記又有長江與  
斜漢爭流白雲將紅塵並落而古今獨賞落  
霞句蓋有幸不幸也

葛常之韻語陽秋云蘭亭記當其群賢畢集游

目騁懷之際而感慨係之乃有一死生為虛誕齊彭殤為妄作之語議者以此咎羲之之

未達也。此在十九卷中。而前第五卷第一條云：「一觴一詠，亦足以暢叙幽情。」則當時篇詠之傳，可攷也。今觀謝安五言詩曰：「萬殊混一象，安復覺彭殤？」而義之序乃以為「一死生為虛誕，齊彭殤為妄作」。蓋及謝安一時之語，而或者遂以為未達。此特未見當時義之詩。而爾其五言詩曰：「仰視碧天際，俯瞰渌水濱。寥聞無涯觀，寓目理自陳。大矣造化功，萬殊莫不均。群籟雖參差，適我無非親。」此詩則豈未達者耶？前已有之。見而後復云：「不知何故，俞文豹吹劍錄云：『滕王閣序本賦景物，序游宴耳。而自關山難越，誰悲失路之人。至阮籍獨在，豈效窮途之哭？』」凡三十來句，無非怨結。蓋勃以殺官奴除名，父福時坐貶交趾，令勃往省侍，道出鍾陵，適遇開宴，因以洩其怨。及去，度海溺死。此文其識歟。

前輩云：地氣高寒，便不生物；和暖，便生物。秋氣

嚴凝便有一般清高氣象。固亦自好。終是肅  
殺。人常存得溫和惻怛之意。便自然可愛。  
語人之短。不曰直。濟人之惡。不曰義。廣積不如  
教子。避禍不如省非。好名則立異。立異則身  
危。風俗不淳。儉則財用無豐足。禮義廉恥可  
以律已。不可以繩人。繩人則寡合。寡合則非  
涉世之道。此省心銓要中語。

書曰土爰稼穡。中庸曰地道敏樹。土地本生物  
以養人。非犁鋤不植。故為田為圃者。啟闢之



餘深不咫尺猶皮膚疥癬耳民用無窮其動  
亦無窮或墉焉而使之隆井焉而使之淵塗  
焉而使之圯惡可免哉今人之有疾患卜者  
輒曰其家動土土神為祟乃召師巫烹鴨以  
為牲粉米以為果設供焚楮以禳之名曰謝  
土若夫深山窮谷日砍其材木是擢土之毛  
髮也日陶其甕瓦是灼土之肌膚也日鑿其  
煤與礦是剝土之肉也日打其石是剝土之  
骨也曾不聞有禳崇之說假欲為之日亦不

足矣。是何土之切切於其爬搔擿抉之微而忘其錐鉗鉗伐之大者哉。詩不云乎。其誰知之。蓋亦勿思習俗之難悟也。甚矣夫。

湖州飛英寺塔中空復有一塔甚奇巧。

余嘗以諺語順天而行。隨時而過。逢場作戲。見

景生情。四句為養身法。塵世如海。人心如淵。

往事如夢。前程如漆。四句為寬胃。左揭之座。

隅。偶閱野客叢書。其採綴經史詩文中諺語。

凡四則。余擇其足為勸戒者。裒載于此。獸惡。

其網民惡其上衆心成城衆口鑠金從善如  
登從惡如崩狐裘蒙茸一國三公家有千金  
坐不垂堂耕當問奴織當問婢一日縱敵數  
世之患欲人勿知莫若勿爲一朝不朝其間  
受刃當出不出間不容髮當斷不斷反受其  
亂一人在朝百人緩帶一日不書百事荒蕪  
畏首畏尾身其餘幾天與不取反受其咎白  
頭如新傾蓋如故皮之不存毛將安傅千人  
所指無病自死怒其室作色其父官無中人

不如歸田力田不如逢年善仕不如遇合相  
馬失之瘦相士失之貧雖有親父安知其不  
為虎雖有親兄安知其不為狼生男如狼惟  
恐其尫生女如鼠惟恐其虎穀弩射市薄命  
先死近市無價巧詐寧拙十指有長短痛惜  
皆相似積財千萬不如薄藝隨身教兒嬰孩  
教婦初來生為人所咀嚼死為人所懽快舉  
頭三尺有神耶龍生龍鳳生鳳對牛彈琴作  
死馬醫不在被中眠安知被無邊一日不作

一日不食讓一寸饒一尺讓禮一寸得禮一  
尺三世仕宦方解着衣喫飯三世長者知被  
服五世長者知飲食一雞死一鷄鳴亡一姬  
復一姬詩句如祇愁為僧僧不了為僧得了  
盡輸僧乍可百年無稱意難教一日不吟詩  
啼得血流無用處不如緘口過殘春舉世盡  
從愁裏老誰人肯向死前閒世間多少能言  
客誰是無愁行睡人不說人間事便是  
人間無事人莫道無金空有壽有金無壽欲

何如萬般無染耳邊風皆杜荀鶴所傳  
若解亡人國越國亡來又是誰今宵有酒今  
宵醉明日愁來明日愁能消造化幾多力不  
受陽和一點塵只知事逐眼前去不覺老從  
頭上來時來天地皆同力運去英雄不自由  
採得百花成蜜後不知辛苦為誰甜明年更  
有新條在繞亂春風卒未依皆羅隱所作又  
世亂奴欺主年衰鬼弄人海枯終見底人死  
不知心亦杜荀鶴詩末飲心先醉不在接杯

酒陶淵明白句也。一朝權在手。看取令行時。朱  
灣句也。逢人只可少說話。賣術不須多要錢。  
劉改之句也。但有路可上。更高人也行。龔霖  
句也。自己情雖切。他人未肯忙。裴說句也。但  
知行好事。莫要問前程。馮道句也。事向無心  
得。章碣句也。忍是敵。災星司空圖句也。在家  
貧亦好。戎昱句也。日出事還生。武元衡句也。  
難將一人手。掩得天下目。曹鄴句也。但存方  
寸地。留與子孫耕。賀仙翁句也。余觀宋諫若

邵康節擊壤集陸放翁渭南集用俗語成句  
甚警策者又不可勝錄矣

硯宜常洗不洗則滯墨滯墨則損筆

臘梅葉擦圖書石甚光滑青葉尤勝枯者

中滿腹脹鎮江張天民醫官傳方云食黃鼠即  
甚效

世宗纂脩祀儀成典勅一道舊借觀于司成水  
南張公家曾照式謄之偶失去越幾稔矣偶  
復得之謹錄于此 皇帝勅諭纂修等官



朕惟祭祀國之大事矧今

郊祀已遵

復我

皇祖初制其中事宜不可無記無

以垂之將來今大工告竣

祀期在邇茲克

降勅特命知建造事總督工程官卿勛同知

建造事督視規制官卿時監視巡察工程官

卿鉉為監脩官知建造事總督工程官卿璵

為總裁官內閣輔臣大學士卿萼卿鑾為副

總裁官首倡正議監視巡察工程官吏科都

給事中夏言陞翰林院侍讀學士仍兼吏科

都給事中不妨照舊掌科事及中允廖道南  
編修張袞徐階程文德為纂脩官卿勛及卿  
璉等宜各殫忠益精思力究遵照朕諭卿璉  
凡例條目纂輯成書名曰 祀儀成典務要  
明白正大以稱朕法 祖敬 天禮

神至意于以為萬世法程守而勿替者斯為  
卿等竭忠致力之道凡勅中未載應行并朕

前諭卿璉條目逐一開具奏請區處卿等其

欽哉欽哉如勅奉行

嘉靖

勅命

九年十月十五

之寶

日

佳茗比佳人。未經人道。惟東坡有詩曰。仙山靈  
雨濕行雲。洗遍香肌粉。未勻。明月來投玉川  
子。清風吹破武陵春。要知玉雪心腸好。不是  
膏油首面新。戲作小詩。君一笑。從來佳茗似  
佳人。比花用美丈夫者。如蓮花似六郎。倭語  
之類。全篇絕少。黃山谷咏醑醑詩曰。肌膚冰  
雪薰沉水。百草千花莫比方。露濕何郎試湯  
餅。日烘荀令炷爐香。風流徹骨成春酒。夢寐

宜人入枕囊，輸與能詩王。主簿瑤臺影裏，慙  
胡牀與東城同一格調。然李商隱已有謝郎  
衣袖初翻雪，荀令薰爐更換香，不免經人道。

過

黃東蓺云從來佳茗似佳人，恰與若把西湖比西子，是天生之對。

廣宗撤舉人大經月影辨月中之影，古今傳記  
皆有桂樹蟾兔之說，蓋以其形迹之近似而  
擬言之耳。其怪誕妄繆，固不足信。若夫先儒  
山河影地影之說，雖頗近理，要亦非至當之  
論也。蓋山河載之大地，山河所在，則地之所

在固非脫然而形影也。今乃舍地而獨歸影於山河，不亦偏乎？則地影之說，舉山河而盡之，猶為彼善于此。然以愚觀之，則其非地影者有三。蓋先儒謂月借光於日，信矣。然既曰日入於地，光自四旁射出，為大地所礙，故光照不遠，而有是影。則近上下弦前後月魄盡行在天，去日不遠，固無所礙矣。而亦有是迹何耶？此其非地影者一也。又地在天中，隕然一大塊，則其影之在月，惟黯然一癡可也。何

至紛紛破碎而為桂為蟾為兔之狀乎若曰  
黑者地而白者水則水之下固有地也乃能  
透地而漾光乎况天不滿東西皆水而白者  
宜居其半矣胡乃黑白紛錯交遍而又若有  
遠近濃淡之分者耶此其非地影者二也又  
曰行于天或正或側當其體盈之候固莫定  
其弦之所向矣自其虧候而觀之宜其影也  
隨時轉移顛倒不常也今其痕迹乃悉隨月  
體定向不易又何耶此其非地影者三也然

則其為何影乎曰日火之精也火之體則極清月水之精也水之體則稍濁月中之影其渣滓之疑結者乎此千古不決之疑愚雖未敢以為必然然較之地影之說或尤近理也故詳辨之以俟知者擇焉陸文裕公深讀而善之又從而博辨曰道體之全三有神有化有物日月者水火之精也水火者陰陽之粗跡也水內涵火內暗月中必有影日中亦然所謂渣滓之未盡者故日月不離于物也懷

慶婁知縣樞謂二公之論未甚明白蓋月中  
有月影猶天上有天河也列子曰天積氣耳  
日月星宿亦積氣中之有光耀者知積氣中  
有光耀則知光耀中有積氣矣

楊五川南宮集中有月華硯銘引載金印古硯  
事曰昔景泰中吾東溪府君守安有二農夫  
偶耕于野得埋金焉詣州請平試問其狀曰  
始吾運鋤于田覺鏗然有聲者三視之得方  
石蓋去石而金見命洗土視之則古金印也



其文為壽亭侯印又命取石至則硯也府君  
乃歸其印於朝取其硯而償若直焉硯之  
在于家餘六十載正德己卯孟秋十有二日  
記所謂東溪府君者即通紀諸書所載兵部  
觀政進士常熟楊集當時以其上于司馬書  
此為安州知州者是也

楸葉膏須依法製之葛常之云汝州楸樹極多  
富鄭公知州時手植數百本於後園後政思  
其人建鄭公堂於楸林之下宣和間先人知

州日聽政燕客俱在焉一日廉訪使周詢來  
訪因云立秋日太陽未升採其葉熬為膏傅  
瘡瘍立愈謂之楸葉膏抵晚憲使王偉來訪  
因道詢語偉曰有人患莪背腸胃可窺百方  
不差者一醫者教用楸葉膏傅其外又用雲  
母膏作小丸服盡四兩止不累日雲母透出  
膚外與楸葉膏相着瘡遂差功亦奇矣余欲  
廣傳此方以拯病苦者

中山狼傳馬左都中錫撰刺李空同惇德康對

山脫劉瑾之害耳刻者雜之唐宋稗官諸傳之列讀者豈能了其意之所屬哉

近時張江陵事議論紛紜田野老農豈識廟

堂事偶見坊刻有翰林子慎行上月林丘少

司寇禱書其言似公可為他年作一案也行

謹啟老伯榮差尚未獲面臺駕嚴裝啟行有

日恐衆中進見不盡欲言老伯此行出自

聖上簡任事體重大恐有難處行在里子之末

不揣輕微有所陳于左右以備采擇惟老伯

垂聽焉。生濫竽詞林，閱有年歲。江陵始末，皆  
所目覩。其殫精畢智，勤勞於國家，與其陰禍  
深机，結怨于上下者，皆頗能窺其大槩。而未  
易更僕數也。當其柄政之時，舉朝爭誦其功，  
而不敢言其過。至于今日既敗，舉朝爭索其  
罪，而不敢舉其功。皆非其情實矣。而連日廷  
中士夫，見其處分過當，亦庶有惜之者。至于  
九卿一疏，切中机宜，關係國體，又莫不傳誦  
欣服，以為義舉。然主上憤結之日久矣。又

有積怨于海內一欲有所出之其是非功過卒難別白且方此其時論亦未定也惟是籍沒一事責在使者竊有深慮敢為老伯陳之今上之所為籍江陵者一則恨馮璫之厚藏而欲求當于外一則考某某之故事而欲合符于前故致在必行而不恤也夫使江陵之家誠如二氏即籍而正法不已晚耶然以事理度之竊知其不然甚也何以實之夫馮璫所取者皆中貴之積也內中大小監局號

為二十四衙門以及門厰庫藏執掃除之後  
者何止千萬每有一缺即納金于保大者以  
萬計其次數千小乃數百予者不以為賄以  
為例也受者不以為貪以為例也如輸粟鬻  
爵而已江陵安得有是自世廟西苑近臣  
積貲鉅萬者不知其數邇年以來其人率多  
老死每一人病甚其家輒走告保保即遣其  
名下內臣為之護喪侍藥至則扃其堂室逐  
其弟姪禁其飲啖坐而待其斃一舉而盡獻

之保矣。如此者又何止數十家。其所得何可  
貲量。江陵安得有是。此九卿疏中所謂比之  
馮保萬分不侔者也。乃若某某之事又不同  
矣。何也。某某日以鬻官為事。如列肆市門交  
手相易。萬貨畢萃。衆價具陳。積蓄不貲。固其  
宜也。江陵則不然。其平生顯為名高。而陰為  
厚寔。以法繩天下。而間結以恩。其深交密戚  
則有賂。路人則不敢債。帥鉅卿一以當十者  
則有賂。小吏則不敢得其門而入者則有賂。

外望則不敢此則所入亦有限矣且此老以  
蓋世之功自豪固不肯甘為濇鄙而以傳世  
之業期其子又不使濫有交游其所通關竊  
借者不過范登馮昕二三鼠輩而其父弟家  
居或以其間隙微有網羅如此而已則所入  
亦有限矣此九卿疏中所謂不及爾人十分  
之一者也夫以所有不及兩人卡分之一而  
其積憤結怨乃十倍於兩人執此而取盈故  
甚難也况其席藁二年豫為道地即有所歲



度已流散今直捕空投虛何以稱塞上命  
從而根究株連全楚公私重受其累是某處  
之已事也使者胡以處之生行以為臺省公  
既本不可少業已寢閣無復及事老伯受命  
而往又不宜有言誠遣一使入說同差中貴  
置馮璫勿談而以彼此不同之狀向中貴熟  
數之使其辭行面奏為上別白冀萬一開  
悟責望稍輕庶至彼中易于區處有以報  
命也又有所懇江陵太夫人在堂年八十老

矣。累然諸子皆徘徊書生。不涉世事。籍沒之後。一簪不得着身。必至落魄流離。無所棲止。可為酸楚也。望于事寧罪定。國法已彰。恤其孤嫠。存其血食。或為之䟽請于上。乞以聚廬之居。或為之私諭有司。恤以立錫之地。使生者不致為樂郤之族。而死者不致為若敖之鬼。又惟老伯高誼能行之。悠悠世情。他又何望哉。生行叨塵館局。嘗遇江陵知遇。已而偶有憤激。得遇知己。竊甚愧畏。自屏于田野。

之間僅而獲免然當其得遇之時亦曾與相  
知有言以為今日阿附相公之人他時必至  
負義今日觸忤相公之人他時必不忘德乃  
今坐視其敗而不能吐一言半詞以酬心許  
又甚以為恨幸而老伯在事得以進言冀有  
萬分之一可以保全其後此區區之公願而  
亦使職之光也老伯其垂意焉謹啓

向有傳  
張敬脩

十三年五月十三日三更時自縊冤書備述  
上司欲坐以二百萬家貲之苦語語酸辛蓋

于公之言亦  
不行也意

此乃文定慎行之事也二文持平論

世宗欽明大獄錄事在丁亥九月余邑大理卿  
湯公沐以此罷斥後

穆宗御極又因都

御史龐尚鵬疏遂追恤罪斥諸臣前後矛盾  
余得項甌東公喬之論曰武定侯郭勲初鎮  
兩廣時正譙恭下也御史周公廣以事謫懷  
遠驛丞武定托求文厚施于周周堅却之且  
有後議勲恨之他日誘其入門重撻二十縉  
紳聞之俱不能平也後馬子錄巡按山西有  
為白蓮教張寅者善燒鍊武定素善之後聚

黨數千人為地方覺舉使坐以左道惑人之  
罪其何說之辭馬子以弘治中謀反脫逃李  
福達者即張寅也遂以張寅即李福達按以  
不軌而武定囑書至馬執書并奏武定謀為  
不軌各道三法司以周故方幸武定有罪欲  
成其獄勲賁緣無所不達聖上明知其非  
不軌也特陞張羅峰掌都察院事陞桂見山  
刑部尚書方西樵大理寺卿專為平反此獄  
而前此三法司及各道緣此為民去位將及

百竄而馬子錄謫戍廣西賓州竟死其地識者謂大獄之成固由武定為張寅伸冤亦因縉紳為周廣報復而周公厲不能見惡人以辟咎則實始作俑者一事之微幾至空人之國嗚呼是豈可獨歸之張羅峰哉可以為戒矣此論在嘉靖壬子以前殆得情者也

何文肅公喬新考元順帝為宋瀛國公之子而著天報宋祖仁厚之意此等議論却不可少教字即是學字古文實同用教學效學俱只是

一箇文字

王鳳洲世貞嘉靖以來內閣首臣傳小訖野史  
氏曰廷和之始微以易進嫌而居位自稱踰  
於前後數公則其才勝也正德之政蠹於左  
右貂譬之衣若鶉結矣不有虞者誰與彌縫  
嘉靖之初收渙為宗社磐石誰之力耶以  
道事君不可則止則冕與紕皆廢幾是二人  
者甫得政而奪之若救屢視宏何霄壤幾也  
宏之初節內勁於權倖而外伸於奸謫不亦

皦皦秋陽哉。為德不終。假辭國老。以名為調劑。然再躋再起。保功名於猜世。則亦長者效也。一清有應變之略。而無格心之本。押闔操舍。此將道也。而行之揆地。智殫力竭。得死幸矣。孚敬因机。遽會一言。拜相。疆直自遂。人主為屈。斯功罪不亦等哉。二李長者。而時稍負荷。春芳知止。伯仲之間也。言詭遇而獲。器不勝才。上僭上下。偏下東市之辱。夫豈不幸耶。嵩沾沾小技。以順為正。內固主竇。而外籠天



下之私即不有孽子寧毋敗也。抑二臣者相  
傾若讐敵。夔伯之地化為秦楚。徐高張申之  
所繇兆也。階赤舄几几。羔羊素絲。嘉隆之際  
亦何下廷和哉。惟其小用權術。收采物情。識  
者不無遺憾焉。雖然若廷和階者俱救時相  
也。拱剛懷強忤。幸其早敗。雖小有才。烏足道  
哉。居正申商之餘習也。尚能以法刼持天下  
器滿而驕。羣少激之。虎負不可下。魚爛不復  
顧。寒暑移易。日月虧蔽。沒身之後。名穢家滅。

善乎夫子之言。雖有周公之才之美。使驕且吝。其餘不足觀也已。此傳乃鳳洲親筆草稿。有一友館太倉。得之。携以借錄于余家。孫者項甌東。私錄載李三洲廣東南海人。問伊廣人食蛇信乎。曰亦有食之者。然有食之全家死。毒者矣。有某學生負出迎提學。內有十數人在明倫堂伺候。忽有一大蛇自梁上墜下。諸生以為奇。取而烹之。將熟。忽報提學到。諸生趨出。有犬見鍋中火湧汁流。地下飲之。諸生

至則犬死竈傍矣即取其肉埋土中數日土  
上出一大木耳黑而嫩蓋毒氣所發也張鄖  
西因言某巡按過山中見木下有大木耳一  
朶甚嫩好以為天花菜也取歸煮食之盡一  
盤即入卧房明日已時尚未起書吏倒門而  
入止見骨頭一副其肉盡化為水流滿牀下  
其毒一至于此因令人掘原山木下得大蛇  
如桶大燒之三洲又言蘄蛇亦有作酒飲之  
而死者曾見餘姚毛食事旅襯問其僕致死

根因云止因一鄉官在湖廣寄一斲蛇主人  
因有暗風疾即浸酒飲之半月腦後發疽遂  
至不可救藥嘗聞有三人行路者渴甚入瓜  
園市一極大瓜共食之登時俱死瓜主掘其  
下得蛇如桶大斬之歷觀數事凡物異常者  
決不可輕食又廣東雷州府養濟院癩疾者  
數百其便溺多癩蟲雞食之谷應官府者食  
其價賤輒買以供官如此等類孝子仁人不  
可不知

正德甲戌南戶部尚書太原張公縉刻宋學士  
文集成序其後云潛溪前後集文粹出于鄭  
氏所輯及蜀本衢本外國本皆略而未完近  
時杭本八帙頗多而為人率妄去取猶未刻  
也初公存目手定八編凡若干首以細眼方  
格命子璵繕錄精整首簡猶公手筆其本亦  
歸鄭氏久之流入錢唐予購得之愛重歲襲  
行輒與俱茲來總漕于淮因命按本翻錄入  
刻稍展而大之為若干帙以公之于天下仁

和卽瑛云予嘗見太史宋公濂詩四冊公親書者也大字如指頂小字如芝麻或行或楷真有龍蟠鳳舞之象高可五寸亦奇物也惜為杭守張公取去今學士集中之詩不滿二百則知遺落多矣按宋公親筆詩文皆落于張姓之手殆亦一大奇事然文以張顥詩以張晦卽一人之詩文而有幸有不幸如此安得更歸于好事者而與文並傳哉

雲間李豫亨云我松張澱山公判溫州時與其

配陸夫人之任夫人故少保完之女也未至  
城數十里天色已冥勸甚欲少憇俄見火光  
隱隱若人居比至使人覘之見一老嫗方擁  
鑪一少婦方織紵聞叩門聲出迎公誠其下  
曰吾上任之辰在明旦不可後夫人且息天  
明徐來未晚也遂與二子先往夫人及二女  
下車進休坐未定嫗顧謂婦曰何不治茗以  
獻婦曰諾汲水舉火乃以兩盃代薪侍女驚  
見大呼時從者百餘人環屋假寢亦群聲大

味何者屋宇器什泯然無迹惟存空林而已  
夫人之次女即庠友趙吾綠之外母時為予  
言甚詳非妄

盧多遜門下士种英蘇冠多遜甚器愛之多遜  
既得罪獨此二人徒步送抵海而還英改名  
放字明逸蘇改名易簡

縣中陳某家有使女如生廣瘡求醫于方上道人  
其方只用乾荷葉一味濃煎湯當茶日逐飲  
之盡量而止不過六七日即愈矣親試驗甚



又一當縣甲首者曾生廣瘡傳方上人方用  
麥母子草根搗汁和好酒同服即愈其草須  
取竹中無露水者為上

倭房公賦沙汰畢督學一文運元倭房出橫行  
一十三府擾亂天目科舉終罷而歲考直抵  
丹陽四府溶溶禍入宮牆起錢神樓開銅臭  
閣滿載裝回狼吞鳥啄且逞威勢張牙露角  
耽耽焉逐逐焉垂涎空澗真有似乎精魄失  
落驀起風波暴若祖龍厥腹虛空昧若何虹

目無睥子誰識西東日長沉醉酒色融融修  
然羨怒令人慘悽一日之內一人之身而變  
詐不齊百金補廩鎮江李孫斗珠入泮無錫  
周秦親家隣友為過財人米麥熒熒亂圈點  
也枷鎖擾擾假公道也湖流漲臙苞直行也  
批撻橫斜門子醉也雷霆乍驚試案出也人  
人駭憂漫不知其所謂也孔方先容雖嫌亦  
妍十目所視而莫揜焉有不可聞者遺臭萬  
年此倭之行藏類市井之行藏不畏天地之

精英故其隔年預托親人渡水涉山訪儒生  
之富貧夤緣其間不分玉石真材銷鑠怨氣  
邇迤道路聞之莫不嘆惜嗟乎皇上之心  
作養人材之心也倭縱貪婪亦當念國家柰  
何取財盡錙銖棄士如泥沙使豪傑之士一  
朝為失色之庸夫雲錦之章霎時為吞聲之  
啞啞案首賊私多於倉廩之粟粒家書包票  
等於官店之帛縷德清光棍遍於直隸之城  
郭厥子受賂出于公庭之招語使旁觀之人

深可鄙而可怒倭房之心方益驕固謗海內  
陷徐舉日本烈炬延燒南土嗚呼戕士類者  
倭房也可殺也護倭房者何人也亦可殺也  
嗟夫使朝廷聽好人則足以拒倭倭不為  
督學之人則自秀才士夫以及君誰得而被  
禍也科道不能明言而野史言之野史言之  
而遠播之是使野史之言而強於國史也  
時萬曆十四年房學院裏浙江德清人通賄  
事露吳中士子作此以譏之戒菴老人年已

八十餘二殊駭時事之多變漫錄之倘不即下地他日展卷亦可一扼腕又有濫青衿文取四書中語依時文體輳合成篇余惡其侮聖言也擲去不錄

余少時學舉子業並無刊本窓稿有書賈在利考朋友家往來抄得燈窓下課數十篇每篇謄寫二三十紙到余家塾揀其幾篇每篇酬錢或二文或三文憶荆川中會元其稿亦是無錫門人蔡瀛與一姻家同刻方山中會魁

其三試卷余為愆憑其常熟門人錢夢玉以  
東湖書院活字印行未聞有坊間板今滿目  
皆坊刻矣亦世風華實之一驗也

牛有獨肝者食之殺人相牛法岐胡有壽膺匡

欲廣毫筋欲橫

蹄後筋也

常有聲有黃也角冷有

病旋毛在珠泉無壽睫亂觸人銜烏角偏妨

主毛少骨多有力溺射前良牛也踈筋難養

三歲二齒四歲四齒五歲六齒六歲以後每

一年接脊骨一節陰虹屬頸陰虹雙筋自尾

屬頸也。此草木子雜俎篇所載，蓋從寧戚相牛經中節出，而又附益之，以便觀者。

附

治六畜諸病方  
開楊花八兩川烏

草烏

白芷

藜蘆

猪牙皂角各四兩

麝香一錢五分黃丹一兩

訶子去衣綠豆粉一兩風化石灰五錢皂角刺  
將右鼻孔俱為細末用藥時堆左堆右先  
吹牛一錢五分  
驢八分  
黃牛馬驢一錢二分  
猪四分

漢明帝聽陽城侯劉峻等出家僧之始也。濟陽  
婦女阿潘等出家尼之始也。

宿娼酗酒世之覆轍相尋，而多未悟，豈聖賢之

訓微與簡約故習而不察耶往閱侯希政一元集中有走筆戒弟書反覆曉譬頗饒名論讀之即登徒子便當回頭恨無藻筆不克爲高陽輩益友會有携莫貢士雲卿所作酗酒戒示余者兩作固可並傳以砭沉酣惑溺之膏肓也雖老眼昏花不怯捉筆侯曰夫係蹄不解猛虎決躡危疾在前孝子進藥非不痛於身哲於口也愛有所至情有所不得不然凡熟諫之道異於責善義方之誨別于忍心



如使畏不祥而曲阿慕怡怡而順非是以一  
蹠之痛易其七尺之軀不忍乎介然之舌口  
而自詒罔極之恨也豈可謂知類哉克己之  
難自昔而稱之柔曼之傾意尤其難者也故  
女我禍水聰明之主以自誤而吳姝越艷智  
術之士亦以誤人譬之鬼物之惑人始者必  
有以中其意使如膏火相滋不盡不止方李  
赤之惑于溷厠也所見無非清都麗宮妖艷  
飮芬者欲以區區之辨易其所見豈不難哉

彼死而有不恤而欲陳之以毀譽利害不亦  
末乎故苦藥所以已疾也苦言所以去惑也  
醫經云疾有不治者二不可藥一不治也可  
藥也而不受藥二不治也始之以不受藥終  
之以不可藥此忠臣孝子慈父友兄所為流  
涕長嘆而呼天也衢塗跬步而楊朱哭之跬  
步之失何足哭也然至其千里也則又不及  
哭也詩曰何嗟及矣是也曲突徙薪以告燕  
雀其信之乎然而有必至之勢其不至乎焦

爛者幸爾吾前所謂啖野葛飲鴆而不死者也古今以來獨一曹公柰何以不賢之軀天地所界父母所遺試之猛獸毒藥僥倖於萬一乎夫文人無行非謂固然惜其是文而延是行猶言斯人斯疾云爾古今文人獨一司馬相如哉屈原之忠為詞賦祖賈誼升堂漢之彥也昌黎東坡唐宋名臣人非堯舜誰無小疵然必立行大節不踰斯為君子至如孔孟左國經史之文何嘗不妙絕天壤但不可

以文目之爾、假令天壤間不生司馬相如、無其詞賦、何損於治、何傷於藝林哉、且相如文傷靡麗、故前輩謂其類俳、而武帝亦俳畜之、此何異奕秋九僚以一技垂聲者耶、昔人謂九原可作、吾誰與歸、區區雖未敢妄意九仞之門、至於及有之牆、不願托足、嘗思執鞭叔度、對嘯孫登、相與遊于無言、而或黷於不得已、則纚纚洋洋、為寒餒帛粟、疲瘵鍼石、即不能然、猶欲鳴其心之所藏、如春蟲秋蚓、宣寫

和氣自得而止無用雕蟲殫極侈靡淫泆如  
相如為也今人固無相如即有之吾亦不好  
文且如此况其行乎而聞以卓氏事自解此  
大謬也且卓氏事相如寧慕其色耶臨邛今  
謂相如窮困幸來過我而王孫奇貨可居故  
謬為恭敬以相如婿之耳已而果大得其財  
為富人馴致以貲為郎顯于漢廷按史記相如貲郎在  
未適臨邛之前此書故走筆未考耳則相如本意不在文君甚  
明讀史者忽之耳如令相如反効其貲財重

帶卑禮以求失身之文君。吾知相如不為也。若為之。則其家徒四壁者。不將愈甚。轉入溝中乎。狗監未薦。天子不聞。獨與失身一婦人。無用之書數卷。而何適矣。然則彼雖失行。猶為身詒。今杭州諸公。慕之名實。而失無相如之利。而有其累。難以言智矣。位尊家溫者。其患遲。位下家儉者。其患速。不觀之膏火乎。雖同于灰燼。而膏之盛者。後亡。亦理也。或曰。膏雖竭。我能續之。燎雖息。吾能揚之。商賈恃什

一之利士大夫仰奉祿之進而能文善遊者  
資朋友之助此其所為續膏繼明之術也悲  
夫吾所為碌碌服賈致身策名扞思竭精者  
寧為區區一女子哉武王不斬妲己乎且好  
色人之天性不知子都之姣者無目者也而  
詩人如雲之棄縞衣之樂豈其性與人殊哉  
誠富貴有羨金餘帛何不自置妖姬深宮自  
娛猶未決裂男女之坊解絕庶恥之維求之  
縞衣綦巾亦其次也夫巫山之雲朝暮而送

人河畔柳枝如林。離亭之位如雨。計文君之所當。豈一司馬相如哉。前袂未分。來衿復結。是何異蹴珍餌行道之中。蒙袂者猶唾之。而聰明之士。願甘心焉。何也。蓋婦人有挾媚道者。其術如鬼神。使人神眩目迷。而不自制。漢史往往見之。吾意倡優之家。其有傳乎。不然。何顛冥之衆。而覺悟者之寡也。商賈負販。縉紳之士。無知愚小。銖銖而積之。胠篋而委之。甘心効其力。沒首而不悔。夫左右戮力。治



生以奉其主者奴也。左噬右搏。得狐兔以効  
之人者狗也。今倡優挾邪術媚道。奴畜犬豕  
天下之人。坐食其錢財。而惑者猶然不悟。一  
旦商者折閱。亡其什一。仕者失官。亡其資財。  
始則匍匐而無所歸。爾猶曰相如愛文君。豈不  
謬哉。吾觀今世文士。類多虛名。昨所觀其人。  
歌詩草書圖畫。其品至下。而能盜虛聲者。正  
猶下里巴人。一唱而千和也。易世論定之後。  
吾不知其人當在相如詞賦之科否也。恐不

能過李赤。李赤詩賦固在。迺能與李白相亂。而因循失足。為廁中蛆。後世士羞言之。況若人者乎。夫蜩鳩之翼。難以圖高。蟬蟀之衣。難以持久。故附鳳者千仞。附驥者萬里。彼悠悠盜名之士。安足榮其咳唾。而與綢繆應和哉。相如之事。既其意指不類。斯今又西施之顰。不可慕效。姑效其倩笑者可也。觀今之文士。非特盜名。乃亦盜利。故辛垣高魯連。以其無求。鄒忌不信賓客之諛。以其有勢。勢移利盡。

雖黃隨變。吾觀今世東書相遺。傾肝相示。語  
卒。未有不涉取求者也。此其交游歸趣大體  
可觀矣。不待交解於張公子。而龍陽之情已  
暴于後言矣。凡斯之類。不奇殫陳。區區今者  
藥石之獻。惟在靜諷六經四子。閉門謝客。使  
天机有雨露之息。則以子之才。如寶鏡拭塵。  
邪魅畢燭。刀刃發硎。向之繚繞游絲。而斷之  
耳。以相如之文明。鄒泗之道。以周南之窈窕。  
易巴蜀之奔亡。斯亦生人之至樂也。於子何

如楮短意長。有言不盡。莫曰昔王無功。著五斗先生傳。而劉伯倫頌酒德。盛言醉鄉之致。於是張飲者赤幟。晉諸名流入狗竇豕圈。累至傷生滅德。禍貽國家。故樂令譏之。夫名教中。豈少立身榮名之地。何至乃爾。荆卿混迹屠沽。灌夫蓋寬饒。使酒罵坐。彼皆有所為。慕義輕生。其殆狂者之儔亞乎。而猶不免身嬰戮辱。宗社墟夷。千載而後。使壯夫飲血。死士吞聲。假令諸君子。能傾身為知己。善謀慮。終

始則燕太子未必首犯狂秦之怒。而田蚡驕貴。奚必甘心魏其。以觸天下之謗口哉。片語發憤。不能自制。甚哉乎酒之流生禍也。大禹聖人也。能即始而見其所終。故飲而甘之。以著明戒。後世子孫。遂有如桀者。以酒為池。使千人牛飲。以樂。嗟乎禹之聖。而不能使酒之不為桀也。此可以省矣。張君去華。負雋異才。頗數醢於德。方其醉也。狂悖癡蒸。過於季將軍。而逮其醒也。恬夷清穆。藹然吉士。然其飲

也必醉。而其悔也不果。又少年負才。則以為  
立身榮名。當在乎此耶。噫。其誤矣。夫不解于  
酒德。而襲古人之迹。故有傷生滅德之咎。即  
晉諸賢。彼所為有托而逃。其將以是辱身污  
行。而幾免于禍者。當以為智。而不以為狂也。  
淵明先生之於酒也。避世者也。畢茂世胡毋  
輔之諸君之於酒也。避亂者也。荆卿之於酒  
也。藏名者也。灌夫蓋寬饒之於酒也。憤世者  
也。淳于生之於酒也。玩世滑稽者也。劉伯倫

之於酒也。傲世者也。張去華之於酒也。襲古人之迹而不解。于酒德者也。吾今與去華約。觴過五行。酒至一升。面作赤色。唇齒間覺灑然以甘。腸胃間覺欣然以悅。則覆觴止酒。以親命告于友朋之中。其不聽者。非良友也。則于止酒也。庶乎其可也。否則莫生且歛衽而避。舍席而逃。吾寧從樂令諸君子遊。不欲附會荊卿蓋灌之徒。而為臧德之士已矣。

風水之說。先王所不道。而周公作洛書。稱兩卜。

潤澤之水、家語堅土之人、剛弱土之人、柔壙  
土之人、大沙土之人、細息土之人、美龍土之  
人、醜呂氏春秋輕水禿癭、重水虺蜃、甘水好  
美、辛水疽瘞、苦水疰偃、任子木氣人勇、金氣  
人剛、火氣人強、而燥土氣人智、而寬水氣人  
急、而賊以此觀之、未有不鍾於水土者、而富  
貴貧賤不與焉、至魏管輅始置格盤、擇葬地  
晉郭景純謂人之死、本骸乘氣、遺體受蔭、乃  
著葬經、及陰陽雜撰、以生人之利鈍、由地理



之美惡。若執券揆懷。遂使末世滋蔓。雖士大夫間。以此構穽。或地未獲。暴露終年。惑亦甚矣。他若僧泓告張燕公。土龍水龍各深一丈二尺。可設窀穸。四維謂之折壁。中項謂之中焦。置玉以助神道。鑄牛豕以禦二龍之類。益不可曉。嗚呼。瓦棺聖周。漆梓柳翼。三王制也。驪山玄室。下錮三泉。今安在哉。術家相傳。新昌石氏。以縣官陰毀先塋。牛鼓一旦罷官。幾及百人。又江右故相家墓地。正德間為逆黨

業棄殆盡及今貴顯富盛無替於前是豈盡  
係於地理哉禹陵闕里享祀無窮存乎其人  
耳宋人倪思父有云住塲好不如肚腸好墳  
地好不如心地好又宋壺山謙父贈地理師  
云世人盡知穴在山豈知穴在方寸間好山  
好水世不知苟非其人尋不見我見富貴人  
家墳往往葬時本貧賤迨其富貴力可求人  
事極時天理變錢水部仁夫詩云尋山本不  
為親謀大半多因富貴求肯信人間好風水

山頭不在在心頭。又得空青先生風水論云。陽宅有三十六祥。居家尚理義一也。子孫耕讀二也。儉勤三也。無峻宇雕牆四也。六婆不入門五也。無俊僕六也。每聞紡織七也。能睦鄰族八也。早完官稅九也。庭除洒掃十也。門外多士君子十一也。閨門嚴肅十二也。尊師重醫十三也。宴客有節無長夜之飲十四也。不延妓女至家十五也。不敢暴殄天物十六也。居喪循禮十七也。交易分明十八也。女人

不登山入廟十九也。祭祀必恭必敬二十也。  
幼者舉動稟命于家長三十一也。姑舅窮親  
在座二十二也。閨人謙婉二十三也。家僮無  
鮮衣惡習二十四也。不喜爭訟二十五也。不  
信禱賽二十六也。不聽婦人言二十七也。寢  
興以時二十八也。不聞嬉笑罵詈二十九也。  
婚娶不慕勢利三十也。田宅不求方圓三十一  
也。主人有先幾遠慮三十二也。務養元氣  
三十三也。座右多格言莊語三十四也。能忍

三十五也。常畏清議。畏法度。畏陰隲。三十六也。右三十六祥。全者鬼神福之。子孫保之。不然。下手速脩。所謂移門換向。趨吉避凶之真訣也。今之惑於陰陽者。何不三復於斯。東坡曰。天下之事成於大度之士。而敗於寒陋之心。人心。

宋郭功父有老人十拙詩。謂不記近事。記遠事。不能近視。能遠視。哭無淚。笑有淚。夜不睡。日裏睡。不肯坐。只好行。不肯食軟。要食硬。子不。

惜惜孫子大事不問碎事絮少飲酒多飲茶  
煖不出寒即出昔人稱為切中老人之病余  
今年八十又加五矣近事遠事皆不能記獨  
喜與人訊問近事檢裨官小史閱遠事自少  
入試執題目牌下便能遠矚及今蠅頭細字  
燈下猶能辨之頗為遠近無遺視二三十年  
前因喪子多哭今且不日人哭余余何哭耶  
笑時或有之未見睫下濕痕也黃昏進糜登  
床酣寢直至日出偶一時聽鷄聲耳日中對

典籍會心處輒手舞足蹈睡殊少也平日好  
陪客坐即少年與兒孫往還者喜與共几席  
步履雖不艱至百步外輒用竹堁子不好行  
也每食必問爛否否必再煮惜子勤勤貧無  
儲惜孫埋頭不掛綠大事碎事入耳或料理  
入手便推却平生酒量多不過三行見人飲  
則酣適淪茗惟以供飯後漱齒餘則畏其性  
寒飲香避之春秋挈子孫郊原一舒嘯冬夏  
惟斗室揮扇擁爐而已余老人其物中之物

耶適有方外道人以相術自逞遽前余曰翁  
肯以一布袍贈我我包翁有太公之壽余私  
忖曰豈余之年亦拘耶退而書此為好事者  
他年作一笑柄

不足為物乃一老僧制此以  
八十二歲而終其家今年壬戌為其終

無錫顧涇陽憲成其制科文人人稱之有携其  
游月巖記示余者余細閱之即古文辭亦吾  
荆川子後一人也錄之記曰予以歲之九  
月六日至桂陽越五日有永州之行行三日  
經道州州大夫張四可氏出謁予為問訊瀟



溪周先生故事大夫曰去州可四十里有月  
巖相傳以為先生悟道處此一奇觀也余曰  
何如大夫曰志言巖形如圓廩中可容數萬  
斛東西兩門通道當洞之中而虛其頂自東  
望之如月上弦自西望之如月下弦自其中  
望之如月之望先生則之以畫太極圖云已  
晤彭將軍哲菴氏語及之亦曰信予曰有是  
哉明日遂偕往既至歷崖而登下而就几少  
息焉徙倚四顧奇石森列滿壁而是眉睫之

間變幻紛沓應接不暇、即王子猷山陰道中、不知有此否、哲菴曰、吾聞諸志矣、如走猊如伏犀、如龜蹢躅、如鳳翱翔、如龍蛇蜿蜒、可謂筆端有畫、予曰、未盡也、擬為之名、卒不得其似而止、遂與二君徐步而前、就其中望之、既圓且朗、果如所言、不謬、予因笑謂曰、今日望日也、故應有此、已轉而西、尋却而東、所至輒佇立凝視、遙相嗟賞、已復登其巔、忽見白雲數點、冉冉從東而來、望之可數里、內外張君

異之指其處呼余而謂曰是濂溪先生故里也余聞之翩翩神王爾時覺得兩腋風生便欲乘雲而往攬濯纓之亭飲其泉一斛洗滌塵氛徐而從先生乞太極圖也為之徘徊者久之既而還坐其下左右薦觴觴到輒盡主亦不勸客亦不辭清言疊疊爾我俱失薄雨既收斜陽欲下陶然相對氤氲滿懷與人竊竊從傍言暮矣弗問也從容謂二君樂乎張君曰當此之際不知胸中有何物亦不知天

地間更有何事彭君首肯曰如是如是二君  
還問予予曰亦復如是起而嘆曰美哉茲游  
也無物內碍忘矣無事外碍忘矣內外兩忘  
濂溪先生之所謂靜也昭昭乎進於太極矣  
吾儕偶爾寄適俯仰之頃意象豁如輒自有  
會心處何況先生乎其所得於茲巖之助豈  
少哉雖謂則之以畫太極圖未為迂也昔朱  
子疏大學格物之義謂一草一木亦不可不  
理會姚江王伯安非之曰柰何舍內而徇外

由今觀之何者為內何者為外河之馬可以  
畫卦洛之龜可以叙疇天高地下萬物散殊  
新腐陳奇摠歸神理人自為間隔耳伯安頴  
慧絕人而所見若此豈其偶未之思與吾於  
茲巖乎有悟也雖然悟之非難實有之為難  
今夫先生之稱主靜何也主者譬如家之有  
長國之有公侯天下之有君王不得一日而  
無非若羈旅之暫來暫去也吾儕幸徵須臾  
之暇揆奇討勝回視膠膠擾擾之鄉迫若僊

凡以故情暢神怡灑然自適退而與膠膠擾  
擾者交。卒亦歸于膠膠擾擾而已。夫焉得而  
有之。不惟是也。吾與張君故生長吳越間。去  
此四千里。而餘彭君即楚產乎。家故赤壁之  
下。去此亦二千里。而餘生平傾慕先生如飢  
如渴。一旦得遊其處。以故目若為之加明耳。  
若為之加聰。心若為之加爽。假令朝於斯夕  
於斯。取諸衣帶之間而足。且將狎之。以為故  
常。漫不加省。欲一幾希於灑然。弗可得也。雖

日居其中。與在膠膠擾擾之鄉何異。然則向之所云靜者。夫亦羈旅之條來條去。而以言乎主靜。恐不特如吾三人之居之去茲巖。僅僅二千里。或四千里而已也。何謂悟哉。二君稱善。就余索主靜之訣。余面壁不為有頃。曰其試問諸月巖。遂各畫一觴別。却越七日。還自永州。爰籍其語而存之。用自省焉。無以貽二君。是歲萬曆十五年也。

海棠欲花盛而鮮。須冬至日用糟水澆根。下世

謂海棠無香惟西蜀潼川府昌州海棠獨香  
成都人謂海棠為花尊貴之也余家有垂絲  
鐵梗二種垂絲者本大于斗枝高于屋開時  
足稱巨麗之觀每以不得相城翁圖之為恨  
王心齋良遺錄曰居是邦不非其大夫故歛牀  
之間孔子不答子路而答子貢以是知八佾  
雍徹之譏皆孔子早年事也人心惟危伊川  
賢者猶因東坡門人一言遂各成黨况其下  
者乎學者須在微處用功顏子不遠復乃道



心也

一傳未終恍已迷其姓氏片文屢過幾不辨其  
偏傍今俗學之通弊也肖立半存烏焉金舛  
誤脫半字以趙為肖以齊為立字經三寫烏焉成馬今俗書之通患也  
能勉強學問而免於俗學則俗書之弊無憂  
矣

荆徹告高帝曰嗟乎寃哉烹也董仲舒士不遇  
賦曰嗚呼嗟乎遐哉邈矣太白蜀道難噫吁  
噓危乎高哉之句盖有所本而世稱為獨造

何也東坡表忠觀碑是效柳子厚壽州孝門  
銘初學信謝氏軌範之說動曰本史記紹興  
之難破每每如此

德國虞淳熙

浙江右衛人  
癸未進士

全孝圖并說

全

寒

釋氏

士中官附

多

日

諸侯

禽獸

孝

乾火渾敦天子土山川四夷水

月

卿大夫

草木

老氏

庚人孝附

圖

卷

中

孝字從老省從子子在老傍抗而不順非孝也老在子下逆而不順非孝也老上子下斯象形矣規者太虛也規中者其孕也約以從老從子之象太虛為老能孳萌為子太虛為老三才萬物為子乾為老坤順承為子乾坤為老六子為子乾坤為老日月五行民物為子日月為老月受光為子日月為老五行民物

為子、五行生我為老、我生為子、山祖脉為老、  
胎育為子、川源為老、委為子、五行為老、渾敦  
氏為子、渾敦氏為老、人為子、二氏父母為老、  
二氏為子、兆人父母為老、兆人為子、四夷父  
母為老、四夷為子、五等之貴者為老、賤者為  
子、禽獸草木各有牝牡雌雄、雖胎化不同而  
生者為老、受生者為子、以老孚子、以子承老、  
無物非孝也、據神契曰、孝在混沌之中、曾子  
曰、夫孝推之後世而無朝夕、無時非孝也、無

物不有無時暫停以應規也。人言釋老超出太虛不拜父母太虛無外復何可超即與同體能不孳萌而為孝乎作全孝圖說

莫遣鵠鷹飽一呼將軍誰志滅匈奴年來萬事灰人意只有看山眼不枯轉食膠膠擾擾間林皋高步未容攀興來尚有平生屐管領東南到處山此宋廣州鈐轄俞似作

方正學詩云前宋文章配兩局盛時詩律亦無儔今人未識崑崙派却笑黃河是濁流

孟勞魯之寶刀傳梁穀注白撰貨貝名平準書

木槿花即佛桑花出黎州轡嶺簷蔔花即梔子

花陶隱居云其花剪刀六出刻房七道胡茄

俗名也即曼陀羅花一云佛桑花枝葉類江南槿樹花類中州芍藥

王雨舟云橫州人呼佛桑為牡丹更可笑有淡紅深紫淺紅淡紅數種剪挿于土即活

萬曆辛卯科浙江鄉試主考為九我李公廷機

同考經房有杭州府推官吳炯當置卷之時

辭色甚不遜于主考李公怒之因索其房落

卷親閱遂摘出一奇卷批中吳曉曉爭駁且

悍然欲束卷解職出場。李公不顧命署于別房中。第六十四名拆出。乃寧波府學生陳恪也。先是初場完後。都臺常公居歆索堪中魁元。卷于學道李公同考。學道取兩卷上呈。其一即陳恪使。吳不忤于主考。則落卷。何由見賞哉。而學道之擬送者。亦當失色矣。又有嘉興李日華。初場已抹壞。因中式中論。不堪刻程。特拔其論。竄數語刻之。錄中真之第九十名。榜末云。觀陳李二君之得薦。場中。信有天

命在不可強也。余邑舊父母蔡南胡公士恭  
為杭郡守。是時與塲事親對余冢孫說胡公  
又謂論語程文末比過接二句是李公採其  
所商榷者。蓋李公本與胡公舊識。而李公館  
于余郡。董君言詩家正其令余邑時也。交往  
最莫逆。而是科又相值于杭。同塲事亦異數  
云。

宋大觀中有士人買靴于鋪翁。見其父葬時一  
靴。怪問其故。鋪翁云。官貧携來修者。候之來。



者果士人父士人拜不顧取靴而去士人追  
逐數里泣呼求教言父曰爾可學鎮江太守  
葛繁士人遂往謁繁因問何以為幽冥所重  
繁曰予始者日行一利人事後或一或二三  
或十今四十年矣未嘗少廢又問何以為利  
人事繁指坐間踏子曰此物置之不正則蹙  
人足予為正之若遇人渴予與杯水如此類  
者隨事而利之無貴賤可行也元時王紹文  
臨終書示其子孫語云利人之事可周旋處

雖獨力亦當自為。害人之事。於戲譴中。雖一念不可妄發。夫利人濟物。幽明一轍。而今之子弟。徃徃奸行小慧。以誣怖人為快者。獨何心哉。

余得宋刻鬼董一書。中有論十王。薦亡兩條。可開世惑者。特揭而出之一云。佛言琰魔羅。蓋主捺落迦者。止一琰魔羅王耳。閻羅蓋琰魔羅之訛也。餘十八王。見于阿含等經。名皆梵語。王主一獄。乃閻羅僚屬。義不得差肩十王。

之說不知起於何時佛所舉三千大千世界  
素訶其一。今所居瞻部特素訶之一洲極東  
南隅於一世界不啻於太倉之稊米泰山直  
微塵耳。閻羅蓋指一素訶世界言之其統攝  
大矣。泰山柰何亦以王號與之敵體哉。轉輪  
王王四天下。蓋人而幾于天者。亦非主冥道  
乃槩列于十王。其餘名號如宋帝五官之類  
皆無所稽據。又七七。日而所歷者七王。自小  
祥以後二年。乃僅經二王。抑何疎密之懸絕。

耶當是僧徒為此以惑愚民耳。一云老子見  
推於仲尼。蓋亦聖人也。其道本以清淨無為  
為宗。衣冠喪祭與齊民同。老子之子曰宗。蓋  
有妻妾矣。而不嘗仕周。其在四民之中亦仕  
耳。特爾尚者不同。非於儒之外別有教也。秦  
漢之言神仙者。其繁如蜚毛。未嘗稱老子。况  
於三清十極之說哉。祭醮符籙始於張陵。成  
於寇謙之。惡其無所本始。迺自託於老子以  
神其書。實於老子不相干。老子書言有道之

國其鬼不神。其設為三官九府仙官將吏以罔民耶。薦亡一門不在洞玄洞神洞真之科。策為後出。模寫釋氏而不克肖。以佛本不言薦亡。後人設為之。已自背本教。道士見其利入之厚。因而徇焉。蓋又張冠二師所不道也。朝鮮國王為謝恩事。萬曆二十年正月二十六日。陪臣李裕仍齎捧勅諭回還。欽蒙聖恩。特賜銀兩綵幣。欽此。除欽依。祇受外。差賸臣刑曹叅判申點齋領表文禮物赴京進謝。

并齋

慈聖宣文明肅皇太后陛下進獻

禮物前去今將禮物開坐合行移咨請照驗  
聞奏施行須至咨者 一紅細苧布壹拾匹

白細苧布壹拾匹 黑細麻布貳拾匹

滿花席壹拾張 雜綵花席壹拾張 右咨

禮部 萬曆貳拾年貳月貳拾日 右朝鮮

國王咨借觀于常熟趙吏侍定宇家者年月

慶大朱文印其文乃朝鮮國王之印六字是

朝廷所賜金印後一大咨字下有花押字極

楷而精紙極厚幾一分光色瑩然外一金漆木匣盛之

鄭尚書淡泉公訓子履淳曰膽欲大心欲小志欲圓行欲方大志非才不就大才非學不成學非記誦云爾當究事所以然融於心目如身親履之南陽一出即相淮陰一出即將果蓋世雄才皆是平時所學志士讀書當知此不然世之能讀書能文章不善做官做人者最多也此嘉靖壬戌冬所訓最是名言

非學無以

廣才非志無以成學原是南陽誠子

戒菴老人漫筆卷之八終

東筆八卷

嘉慶十年己酉八月

庚午八月